

洞真太一帝君太丹隱書洞真玄經 一名三元浩篇

紫微夫人初受此經時 先作此誦曰

絳景浮玄晨 紫軒乘雲征 仰超金闕內 俯眄西華城

東霞啟五暉 神元煥七靈 翳映紀三燭 流任自齊冥

風鼓空洞宇 香煙散玉庭 手攜織女舞 雙衿落錦青

左徊文羽旗 華蓋隨雲傾 宴寢九庭外 是非不我營

抱空泥丸內 天姿與日嬰 豈同憊穢中 慘慘無聊生

扶桑翠空峰 朱靈葩微明 滄臺宵虛上 四觀映高清

飛景控紫輪 三素轡丹駟 偃宴太帝館 教曹阿母庭

濯漱碧瀨波 提契玉醴鬯 曲晨乘風扇 瑤颯時下傾

颯適圯藹中 迴駕汜良貞 玄會自相要 流浪任玄冥

始知榮辱辛 方悟憂促齡 曲室可清淨 頤真待日成

何為講當塗 百痾從是生

紫微夫人姓王 諱清娥 字愈音云 是西王母第二十四女 紫

微宮在北溟外羽明野玄壟山 玄壟山在崑崙山之東北 紫微說阿母

言曰 欲存服日月炁者 當知日月景象 日圓形而方景 月方精而

### 洞真太一帝君太丹隱書洞真玄經

### 清微藏書閣

圓象 景藏形內 精隱象中 景赤象黃 是為日月之魂 若知其道

乃可以吐納流霞耳 服日炁之法以平旦 採月華以夜半 存之去

面前九寸 令光景照我泥丸 下及五藏 洞徹一形 引炁入口 光

色蔚明 良久乃畢 常得長生

右中侯夫人說紫微諱字

太一帝君太丹隱書洞真玄經 如是寶經 藏之太上六合紫房之

內 南極元君主之 故曰太丹隱書 此書一名帝君七化變景九形

一名太一三度帝寶五精 一名帝一混合三五立成 各四時寶焉 故

總合太一之經也 子若有之者不死 奉之者長生 存之者神仙 懃

之者真靈矣 太一虛生上玄道君 命太極真人遣玉華玉女九人 金

華晨童七人 侍衛洞真玄經 營護有經者身 擁濟佩符者魂 玉童

玉女記諸罪福 言功戀修者 子有是經 當立密屋 寢處不雜 宣

通冥會 以期真炁 又常燒香左右 數自沐浴 默爾存神 人莫覺

焉

太極真人三春記 書曰太一帝君太丹隱書洞真玄經 三夏記

書曰帝君七化變景九形 三秋記 書曰太一三度帝寶五精 三冬記

書曰帝一混合三五立成 故四時異號 隨節常生 所謂混合萬變  
不居一名 是為至道之書 以致真靈也 夫學道而無太一 猶視  
瞻之無兩跟 存念而無太一 猶胸腹之失五藏 御神而無太一 猶  
起行之無四支 立身而無太一 猶尸僵而無炁矣 是為此經 開通  
萬神 生成魂津 千塗百徑 須太一而立一人焉 若學無師者 徒  
自煩勞也 今別復撰此經之波流 鈔出其外際 未陳幽妙 靡該祕  
唱 名為太一別訣 如有可尋 以悟始涉末 令頓開深源者也 自  
使別訣微行於學者 涉羸跡以玉覺焉 至於幽玄內構 合奇萬津  
流會真神 混合靈府 偉燦于神景之變 發曜于造化之外 煥如圓  
曜 寂如太無 鬱起而空洞結雲 凝思而千年繼夜 可謂微乎深哉  
太一之愛也 皆理竭於此經 事悉於洞玄者矣  
夫人者 受生於天魂 結成於元靈 轉輪九炁 挺命太一 開  
關三道 積神幽宮 所以玄液七纏 流津敷澤 日月映其六虛 口  
目運其神器 雲行雨施 德擬天地 胞胎內生 五因來具 立人之  
道 其如此也 故五因者 是五神也 故三道者 是三真也 夫五  
神 天之魂也 三真 天之道 九炁 天之胎 太一 天之源 日

### 洞真太一帝君太丹隱書洞真玄經

清微藏書閣

月 天之眼 玄液 天之潤 六虛 天之光 幽宮 天之府 神器  
天之化 元靈 帝之變 凡此言九炁者 乃混合帝君之變 變而  
化九 是謂九宮 混變而同一矣 夫兆欲修己求生 當從所生之宗  
所生之宗 謂元父 玄母也 元父主炁 化理帝先 玄母主精  
變結胞胎 精炁相成 如陰陽相生 雲行兆己 道合無名 數起三  
五 兆始稟形 七九既匝 兆體乃成 和合三五 七九洞冥 象帝  
之先 當須帝營 天皇之功 九變為靈 功成人體 體與神并 神  
去則死 神守則生 是以三元為道之始 帝君為道之根 太一為道  
之變 九天為道之神 九宮為道之宅 玄田為道之圃 玄液為道之  
津 修之三年 可以照鏡三田 以致神仙 朝適六合 夕守泥丸  
堅執胎精 心中常歡 後學之子 須此為緣 見是經者 始可與言  
九黑陶注 太一運神矣 子既得為人 人亦眾矣 自無太一靈簡  
三元金名 司命隱符 五老紫籍 雖受天炁而生 皆不得聞見至道  
矣 子又無玄宮紫札 上皇寶名 太一玉籙 東華隱圖 三元銘神  
太帝參魂者 雖受天之性 既得暫聞至道矣 亦不能修為 為不  
能久 久而不固 固而不專 專而不能洞也 適可隱存五嶽 登行

常生之塗耳 不得八景超宵 浮煙控暉 飛騰虛羽 踴躍太無矣  
子又無瓊臺羽札流雲五校太一金閣五皇隱籙 後聖七符空山石函丹  
臺素章 玄黃五行天母抱圖 太上圓名保真秀炁九鍊神軀之錄者  
皆不得見洞真玄經 睹帝一之變 又不得聞消魔神虎智慧之詠 又  
不得聞太上隱書八素之辭 又不得聞大洞真經三十九章 金真玉光  
豁落七元也 夫至道之經 幽幽冥冥 唯在勤心存念 注心冥會  
然後靈以啟運 神以密感 九神合聚 太一書簡 徐乃得聞玄妙之  
門 生命之本源 微乎玄矣 可不勗之哉  
存念太一 混合帝先 雄雌守神 灌流浩清 常使九天順炁  
則一合九成也 夫洞真其要也 則一體常存 津血自生 雄鎮命戶  
雌守神室 太一無離 與天同時 故太上隱符曰 存其雄 守其  
雌 乃天地不能彌也 既存之焉 則五神守宅 五藏生華 靈栖絳  
宮 帝鎮泥丸 百神堅固 胎塞命門 久則三一之神夕見 太一帝  
先晨降 并見形於子之寢處也 子當清潔齋淨 斷絕外事 杜塞邪  
徑 節諸人物 罕為修詣 精心在一 晨夕修道 孜孜不替 沐浴  
五香 別靜一室 燒香左右 以期真炁

### 洞真太一帝君太丹隱書洞真玄經

### 清微藏書閣

夫太一之道 尤忌見血腥鼻臊穢之炁 若泣涕墮落 則帝君  
悲擾 哭聲發口 則太一凝結 太一凝結者 九炁止而不變 三一  
悲而不攝 九炁不變 則三一亦結 結滯日積 則生炁泄出 而故  
炁運入 故炁運入 將病將死之始也 是以真人謂哭音為死絕之聲  
謂泣涕為漏精之津 可不慎避之哉 若一見死尸 及積日哀哭者  
則帝君獲罪 謫於太上 太一受考 譴於玄虛也 未及三年 子  
必亡矣 諸不受太上之道者 自不得同之於學生也 所以至忌哀哭  
穢穢憂淚之感 以為太一帝君之精思也 又不得臨見死尸 自受書  
之後 若見四十九尸者 皆不得長生 必中道絕命 若見二十四尸  
者 則當暫過太陰 然後起仙 以為死尸之形 既眇於兩眼 尸鬼  
之胎 亦滯纏於人思 人思所存 記於絳宮 絳宮所識 雖忘猶存  
宜漸歸身顯尸 塞思記之眼故也 子厚慎之哉 見血尸喪穢穢哀  
哭泣涕 皆太一之至忌也 若常齋淨 則存思易感 精神立會 太  
一鎮命 歡欣混合 行之一十八年 白日昇天 此真人迴老反嬰之  
道也 常當沐浴五香 五香者 青木香也 青木華葉五節 五  
五相結 故曰五香之草也 辟惡氣 檢魂魄 制鬼煙 致靈跡 以

其有五五之節 所以為益於人耶 此香多生滄浪之東 故東方之神  
人 名之為青木之香焉 又云 燒青木香 及薰陸安息膠於寢處頭  
首之間者 以開通五濁之見 止地上魔邪之氣 直上衝天四十里  
此香之煙也 破濁見之炁 開卻邪穢之霧 故天人玉女 太一帝皇  
隨香炁中而來下 憩子之面目間焉 燒香夜半時 亦常存而為之  
勿廢忘也

存三一 守太一 精洞房 會帝君 則化生九靈 於子形中  
輔子之神明 成子之仙真 保子之長生 固子之胎魂也 白元 無  
英 桃康 司命 太一 混合五神 捧籍列符 五神各有所主 混  
合九變 三五洞化 於是三宮鎮真 百節受靈 帝君寶籍 宿命無  
傾 周旋虛煙 啟通玄精 二十四真忽然而生 上開上元 下開八  
冥 左朝六甲 右使六丁 玉華引日 太一并形 千乘萬騎 舉身  
登晨 白日昇天  
真人修是太一之道者 皆得三天之舉 故曰舉身登晨 白日昇  
天 以雞鳴時晨登空無 比日之中 到于三天之上 日之正中為白  
日 雞鳴之始為登晨 是以存太一混合 多用鸚鳴及生炁時也 子

### 洞真太一帝君太丹隱書洞真玄經

清微藏書閣

有太一洞真玄經者 別為囊笈 封以寶器 盛之機上 每事朝拜  
如奉君父 若所作所向 必先啟白再拜 三密呼太一九君名字 因  
言所欲求乞 夢應以占吉凶 其心精到者 臥覺之時 立有感效也  
若宜誦習施行看省者 別寫一通 以謹案之 至於機上之經 以  
為尊寶

三元隱化 則成三宮 宮名太清 太素 太和是也 三三則九  
故有三丹田 又有三洞房 合上三元 其則九宮 九天九宮中有  
九神 是謂天皇九魂 變成九炁 化為九神 各治一宮 故曰九宮  
太清中有太素 太和 洞房中有明堂 絳宮 是曰六府 上曰天  
府 下曰洞臺 三五之號 其位不同 一曰太清之中 則三五帝君  
二曰三一丹田神 又五者 符籍之神 太一 公子 白元 司命  
桃康君是也 合而名為三五 三五各有宮室 若三真各安在其宮  
五神上見帝君 帝君左有元老丈人 右有玄一老君 此則無極之  
中所謂九君 上一則真一也 九君所謂天之魂 自然成真之子也  
以為兆神者也 若兆知精存九君 深思三真 必能以兆一體 周旋  
三五之中 反覆七九之裏 使天帝之靈魂 常治在兆已 五神捧籍

周而復始 必將白日登度 何但不死而已哉  
帝君混化 周旋三五 太一萬變 結成七九 其數合二十四也  
天有二十四炁 炁之上化也 變而則成真人 人亦稟之 故體有  
二十四神 神有千乘萬騎 雲行八極之中 子若思存念之 慎勿忘  
可以辟死求生 上超十方 於是神安炁洞 上與天通 越出地戶  
過度天門 隱息四維 七星散分 飛行雲房 日月殖根 守金藏  
玉 制御萬神 仙王何人 我已成其真矣 此隱存之道也 並有經  
訣 在上皇中極寶景篇中 子既有之 不得妄傳 必須歆誓 審人  
乃宣 帝一道尊 七九萬化 所謂一變萬千 七九復還 天道不遠  
三五復反 子知一尊 長生飛仙 子知三五 橫行天下 不知一  
尊 雖生無根 不知三五 身歸於土 斯言信也  
大洞真經 曰 天有九魂 不可不分 道有三真 不可去身  
帝一變景 萬化以臻 流珠停暉 紫霞踊煙 七度迴路 三光映真  
太上精符 相與為親 斯言妙也  
又 高上神霄經 曰 魂生無中 布在九宮 道出三極 常遊  
絳宮 三宮合化 是為紫房 紫房所在 先由明堂 兆能知之 當

### 洞真太一帝君太丹隱書洞真玄經

清微藏書閣

開金門 金門 洞房之內也 又曰 混而合之 出入帝方 三五合  
一 必成仙王 此謂混合之時 三真五神之道也 帝方 太清域也  
故 大洞真經中篇 曰 二老在左右方 帝魂不可不分 三九變  
其上下 太一立其中根 五神奉我生籍 司命塞我死門 九宮合而  
為一 六合總而內真也 此言謂分別其宮室 混合其變化 此道是  
太上寶行 長生根本 立人之帝先 為道之元始 生府之仙宗 帝  
籍之祕章 洞真之奇妙 九宮之要經也

九真中經 曰

九魂離合	三光同暉	天皇在元	紫煙霏霏
五神奉圖	性命不虧	變入九宮	帔服朱衣
腰帶虎章	流雲繡帔	幃帔爛斑	五色徘徊
日月照察	俠以東西	神庭內體	以除渴飢
三五復反	轉藏營機	周流太一	生均兩儀

謂天皇在太清中 太一受哺養 五神奉符籍之時 學者存日月  
以俠照也 此中經一篇 指說太一之名事 故記出焉  
夜半生炁時 若雞鳴時 正臥閉目微炁 存左目中出日 右目

中出月 并徑九寸 在兩耳之上 兩耳之上 名為六合高窗也 令  
日月使照一身 內徹泥丸 下照五藏 腸胃之中 皆覺見了了 洞  
徹內外 令一身與日月光共合 良久畢 叩齒九通 咽液九過 乃  
微祝曰

太上玄一 九皇吐精 三五七變 洞觀幽冥

日月垂光 下徹神庭 俠照六合 太一黃寧

帝君命簡 金書不傾 五老奉符 天地同誠

使我不死 以致真靈 遏制萬邪 禍害滅平

上朝天皇 還老反嬰 太帝有制 百神敬聽

畢 乃開目 名為日月鍊根 三元校魂 以制御形神 辟諸鬼

炁之來侵 使兆長生不死 夕夕存之矣 又存左目為日 右目為月

共合神庭之中 卻上入明堂之中 化生黃英之醴 下流口中 九

咽之 以哺太一 常以生炁時存之畢 微咒曰

日月上精 黃水月華 太一來飲 神光高羅

使我長生 天地同柯

畢 五日行之

### 洞真太一帝君太丹隱書洞真玄經

### 清微藏書閣

口中舌上為神庭 存日月既畢 因動舌 覺有黃泉如紫金色

從舌上出 上流卻入明堂之中 名為黃英之醴也 存思之時 當閉

目絕念

常以月朔之夕 生炁之時 安臥閉目向上 心存二十四星 星

大一寸 如相連結之狀 又存一星之中 輒有一人 合二十四人

人皆如小兒始生之狀 無衣服也 於是二十四星 直從天上虛空中

來下 迴繞一身外三匝 三匝畢 以次咽以入口中 凡作二十四咽

咽時輒覺吞一星也 覺從口中徑至臍中 臍中名曰受命之宮也

又覺星光照一腹內 洞徹五藏 又存星光化為二十四真人 並吐黃

炁如煙 以布滿臍中 鬱鬱然洞徹內外也 良久 微咒曰

二十四真 迴入黃庭 口吐黃炁 二十四星

灌我命門 百神受靈 使我骨彊 魂魄安寧

五藏受符 天地相傾

畢 名曰真炁入守命門 以辟災禍百鬼之疾 令人長生不死

太無混合 以象一靈虛生之子 以為上帝君 又居泥丸之帝

以為三一之尊帝 尊帝者 是虛生之子也 是謂三帝焉 太一受生

於空洞 變化乎八方 立景於三帝之間 流會乎萬神之領 天地之尊 皆須太一而自運也 靈帝無太一 則玄虛不迴炁 尊帝無太一 則三一不居其宮域 故太一之神 併五神以通用 上舍體於三帝 帝之為高 猶天皇帝君者也 等形九魂 魂生三五 三五合會 結成帝君 將帝之生也 受玄中上炁 三五離合之所挺焉 是以帝生於無極之表 玄成之中 見於太清之域 治在玉清紫微宮中 光曜五色 華蓋九重 前洞泥丸 後開幽門 下臨六合 上連紫雲 百官宿衛 飛閣交通 玉殿朱陛 內有金房 中有太真 號曰天皇 憑虛而生 處無極之中 衣五色珠衣 冠九德晨冠 制御天岡 時乘玉龍六轡 超虛九道自通 此自然之精炁 眾真之帝君 兆常思而誦之 可以為仙王

太微中有三皇 一曰皇君 二曰天皇 三曰皇老 此皆三元之炁 自然混成之真也 三元各是一君 同在太清之中 太清有三宮 無上為天皇帝君之宮 左為太素宮 右為太和宮 三宮所在 泥丸之門 無極之內 故皇君御一 總持神剛 天皇統二 變景守形 皇老監三 維制萬神 太一混合 成生兆身 於是三五分化 填

### 洞真太一帝君太丹隱書洞真玄經

### 清微藏書閣

滿九宮 故太一之神 為化生之主也 亦天之魂 治在太清之中 勾陳之內 常侍帝君 主真元之炁也 號曰大素君矣 太和君皇成老子 天之魄也 亦治太清勾陳之內 號曰太和君 常侍天帝 主胎元之氣也 太素 太和二君 此天地之魂魄 生於自然 太素元成老子 太清之中常侍帝君

皇成老子 常侍天帝 出入紫微 正在崑崙 黃闕紫房 太一相參 混沌三炁 大道之根 子常思之 帝來長存

以月二日 三日夜半 存元成皇老之法 安臥閉目 先思太極 中皇帝君 次思左有元成老子 衣青衣 冠九華曜冠 左手持青芝 右手執青幡 次存右有太和君黃成老子 衣白衣 冠五華白冠 左手持金夜漿 右手持白幡 並在太極之中 太極之中有九名 太清中有五帝六府九宮名 其域同一也 一曰太清 二曰太極 三曰太微 四曰紫房 五曰玄臺 六曰帝堂 七曰天府 八曰黃宮 九曰玉京玄都 要而言之 從人項上直下一寸 為太極宮 太極宮方

一寸耳 太極宮在六合宮之上 六合宮 太一之神居焉 從兩眉間  
卻入一寸為明堂 卻入二寸為洞房 卻入三寸為丹田 其明堂之北  
洞房之南 兩眉之間上一寸 為六合宮 六合宮方一寸

存三真人畢 又存我魂一人 如我之狀 上入太極宮中 二老  
因授青芝 金液漿見與 以次存食青芝而飲漿 青芝似蓮華 漿似  
美酒耳 飲食都畢 乃已存再拜帝君之前 而言曰

今日告青帝君在庭 賜以神芝 金液玉漿 二老度籍 太一奉  
章 長生久視 壽命未央 又存帝君答曰 幸哉 奉時月二日 三  
日復來 畢 因以取服 名曰受帝之藥於紫房之中也 故《消魔  
經》曰 魂可求食 上詣太極 二老授命 帝君之力 是此謂也  
存思太極之時 皆當從兩眉間而入焉 兩眉間為泥丸之玉門 名曰  
守寸 黃闕紫房矣

常以本命日 或正月一日 或以六戊日正中 兆冠帶入室 北  
向再拜 咒曰

高皇帝君 太上玉晨 皇天元老 無上大道 曾孫王甲 願帝  
君長安兆已紫房宮中 其夜人定時 入密室 正臥冥目上向 存念

### 洞真太一帝君太丹隱書洞真玄經

### 清微藏書閣

北斗太極中央大明星 精曜正黃光炁來下 存兆目前 引入口中  
咽三十七過止 存使黃精和炁 填滿太倉黃庭中下丹田 下至陰室  
地戶 周行匝體 悉令畢至 乃又念紫房宮中有五人 歛象成五帝  
天皇帝君正在中央 太一來上 當跪帝前 奉兆命藉 司命立後  
除兆死錄 存削去死錄 死錄 黑簡白書也 生錄 白簡青書也  
存見白玉之簡 曾青之筆 司命進授此白簡青筆於帝君 帝君伏  
南向而書之曰 某郡縣鄉里王甲 字乙 生簡記年 長生上玄 所  
向如願 為真為仙 天下見者 皆曰真人 太一可命 保護甲身  
永養日月 壽百萬年

又心存籍簡一枚 令長一寸 廣五分耳 思念書 字 極令了  
了 又次存太一 公子 白元 司命 桃君五人 從六合宮中 上  
入紫房 入紫房中 各奉青玉案 案上各有一符 符各有青綠色  
以呈帝君 帝君以次取符 付向者 共化之四帝 其一帝名曰彫梁  
際 字青平 其一帝名長來覺 字南和 其一帝名彰安幸 字西華  
其一帝名保成曷 字北伐 存此四帝 并共讀五符 讀五符畢  
因授以與兆 兆得符 即跪帝君前 以次服之 存一符令長一寸

廣五分耳 即畢 又存四帝從虛空中 上昇三天 臨去各告兆曰 子能常存我名字者 則辟萬害 長生不死 我太上之子 三元之內 真 度汝命籍五符入形 故以永存天地 以致仙靈也 若春月也 則存青平帝 以青液之醴 盛以青玉碗一升 見與服之 服之畢 四帝俱上昇三天也 若夏月也 則存南和帝 其四時倣此矣 所服之醴碗 亦隨春夏秋冬之色耳

又存帝君之左有玄一老子 服紫衣 建龍冠 又存帝君之右有三素老君 服錦衣 建虎冠 夫龍虎之冠 象如世間遠遊冠 而有龍虎之文章也 玄一老子名林虛夫 字靈時道 三素老君名牢張上 字神生道 二老並從正一仙人在後 其左仙人仲成子 一名帝賓 字四華 其右仙人曲文子 一名光堅 字靈和 服色衣冠亦如二老之狀 畢 又存司命下至六合中 詣太一宮 司命合形太一 一復上請帝君 度兆符籍 太一啟帝君曰 符籍已度 司命合形 四帝賜醴 高上記生 乞得書名 出錄以付二老君 於是帝君忽於懷中出兆命籍 付左老子 又於懷中出兆五符 付右老君 二老受符籍 而言於帝君曰 某甲生錄已定 長存世上 帝符五行上記太

## 洞真太一帝君太丹隱書洞真玄經

清微藏書閣

素宮 於是二老命二正一仙人仲成子 曲文子 賚某甲命籍五符 上詣玉清太素太上三元上清高玄諸君九天宮 宣令帝度某甲生籍 使得神仙 號曰真賢 二老有命 皆使記焉 於是 二人賚兆符籍 由曰一于九天 良久都畢 又存司命 太一分形 各為一人 共遊行太清 檢御一體百神 上下既匝 各還其宮 名此為百神混合 本命帝君大變之道 五帝定錄之時 二老定生之會也 混合本命之時 眾事煩多 不能詣識者 可密室按文讀而為之 其三一之神 泥丸丹田宮 別有天帝君 是紫房帝君之子也 混合本命時 先存在三一天帝 絳宮 命門三神 各安其宮 此宮別有三一經也 今所混合萬變者 非三一之天帝也 三一天帝 自復有混合之時耳 別各有異法 法任不同也

帝君主變 太一主生 司命主命 稟英主精

白元主魂魄 桃康主神靈 人有五籍五符 稟之帝君

五神執之 各主其一 間關本命 除死上生

而無太一之事者 萬不生也 雖復志道求生 精誠虛盡 亦無益也 縱復有至德天地 功顯三官 柔仁之行 感徹萬神 不知思

存皇君 內修三五 還五籍奉五符 令太一詣帝君請兆求仙 終不能過度七九之中 上補仙官矣 諸帝一君二老 及三真五神名字 慎不可以示人 禍滅子門矣 太一寶訣 待盟乃傳 寶訣者 洞真玄經也 先審其人 然後乃以金青為誓 以代敵血之盟也 又日日心存 常令三魂入在太極宮 與帝君周旋為佳也 又常以本命日 勿言惡事 當閉室存生之炁 得為善行 慎勿違之矣

太一者 胞胎之精 變化之主 魂魄生於胎神 命氣出於胞府 變合帝君 混化為人 故太一之神 生之母 帝君之尊 生之父 太一名務猶收 字歸會昌 又名解明 一名寄頻 此三元洞玄內寶經之真名字 外訣雜鈔云云之名 皆非實非真也 今此名字甚不可告人 自知之者 長生不死 辟卻萬禍 能致神靈玉女來降已矣 夕夕當存太一在己身中六合宮 或存太一在兆左右 坐臥背向無不在也 皆以生炁時存之畢 咒曰  
太一之精 起於太清 魂魄受化 形影為靈  
攝御百神 拘制三陽 帝君主煙 合真會昌  
內安精炁 外禳災殃 卻除死籍 延命水長

### 洞真太一帝君太丹隱書洞真玄經

### 清微藏書閣

衣服老少 變易無常 常治六合 周旋絳宮  
下達洞門 上到玄鄉 混合三五 遊息天庭  
呼引日月 變化雌雄 攝兆符籍 胞胎之囊  
死生之命 太一扶將

存太一與兆形正同 衣服亦同也 是以兆之身常當齋潔而修盛 以求會景於太一也 衣服中物 一不得假借於不同炁者 諸如此類 皆當慎之 子既不能服食去谷 精思研真矣 當節諸躁穢 腥血雜食葷辛之菜 一為禁絕 若能如此 少以愈矣 可以庶生命之長矣

左無英公子 結精田之主 三元上炁之神 結精田於天精 精生歸於三炁矣 故無英公子常攝精神之符命也 名玄元叔 字合符子 又名元素君 一名神公子 常在玉房上清之內 夕夕存思之

畢 咒曰

太上玉真 皇精相連 三元英炁 太玄紫晨  
九霄挺明 五華生煙 黃闕金室 中有大神  
握固流鈴 首建華冠 紫蓋迴颿 龍文虎文

貌狀嬰兒 四靈同均 出丹入虛 合形帝君  
呼陰召陽 天道有真 名曰玄元叔 號為無英君  
周流九道 散化五常 生我扶我 與道長存

右白元君者 或曰洞陽君也 主攝魂魄之炁 檢御靈液之神  
故魂魄生於九靈之宮 神液運於三炁之真 是以主御之者 號曰白  
元洞陽君 攝持魂魄之符命焉 白元君名心靈標 字玄夷絕 又一  
名朱精 一名啟成 治在玉堂上清之內 夕夕存思畢 咒曰

太上神精 高清九君 三炁結變 正當神門  
龍衣虎帶 扶命還魂 腰佩玉書 黃晨華冠  
把籍持符 呼吸混分 名曰鬱靈 號曰白元  
與我俱遊 上到陽關 周旋九清 六合之中  
下養精液 泥丸上元 百神扶將 各鎮寶宮  
檢御既畢 還安黃房

中央司命君者 或曰制命丈人 主生年之本命 攝壽天之簡札  
太一變魂而符列司命 司命混合而對魂帝君 故司命之神 主典  
年壽魁柄長短之期 是以混合之大 以符籍而由之 故稱丈人焉

### 洞真太一帝君太丹隱書洞真玄經

### 清微藏書閣

名理明初 字玄度鄉 一名神宗 一名靈華 白日治幽極宮 通御  
陰房 出入神廬兩門中 夕治在玄室 地戶之中 幽宮之下 六合  
宮之上一界中耳 陰房者 是鼻之兩孔中也 司命出入 當由鼻孔  
不從兩眉間也 夕在玄室 為玉莖之中 地戶亦為陰囊中也 若  
女子存之 令在陰門之內北極中 夕夕存思焉 存畢 咒曰

皇一之魂 化成九宮 混合三真 變景帝庭  
幽極玄戶 中有天靈 周旋七運 百神合成  
攝籌把筭 司命之精 龍衣虎裙 冠巾七星  
常在我已 安存我形 號為丈人 名曰理明  
上通符命 使我長生 三元六府 萬關調平  
攝御靈炁 與兆合并 龍輪徘徊 共登太清  
齊光日月 幽幽冥冥 刻命青錄 天地俱傾

命門桃君者 攝稟炁之命 此始炁之君也 還精歸神 迴精變  
白 合化規始 挺生立肇 寔天地之資元 陰陽之靈宗 金門玉關  
房戶之寶 並制命於桃君之炁也 故太一還景 帝君合魂 還景者  
俱混同以萬變 合魂者化精液而生也 精變之始 由桃君而唱

以別男女之兆焉 桃君名孩道康 字合精延 一名命玉 一名胞根  
白日治在金門五域之中 是為臍中命門 下丹田之宮也 夕治在  
六合中 太一之右焉 夕夕存思畢 乃祝曰  
玄元結精 虛無合煙 胞胎之結 陰陽之親  
太上三炁 下入兆身 百節受靈 萬神各陳  
混沌為一 名為桃君 形如始生 暉暉衝天  
衣服五色 華綵風文 手執神符 合帝之魂  
腰帶虎書 赤巾丹冠 金林玉榻 正當命門  
口吸精炁 強我骨節 右有神女 手把朱幡  
左有玉童 書記帝言 陽黑左行 混變未分  
陰炁右過 流行七旋 下至無下 上詣泥丸  
常遊九宮 出入幽門 攝鍊魂魄 六府之間  
領錄萬神 與我俱仙  
右三五混合化生五神之法 此五神者 稟五炁之大靈 符玄命  
之宗也 上生虛無 下結一身 身中之生生 須五神以起居焉 兆  
當夕夕存思而祝之焉 若不能聞諷 可白日按文而修之 不必夜半

### 洞真太一帝君太丹隱書洞真玄經

清微藏書閣

要生炁時耳 夫三魂生於五神 三真出於五靈 故謂此道為混合  
三五之法焉 行之者長生不死 名此道曰北察明堂曆神紫宮 生化  
三五朝胎上元者也 雖已得仙者 亦當行之 行之者常生也 存思  
之時 坐臥任意 若坐者得向本命為佳 若不能頓思五神者 可以  
次先存二神 後存三神 周而復始 先從太一始也

夫精思存念 欲得至清至靜幽房閑室 若山林之中 不與人接  
聲 穢濁炁所不聞 乃可行之 先念三五混合之法訖 乃又閉目內  
視 叩齒九通 咽液九過 乃微咒曰

九元之真 真有三田 雲房金室 中有五靈  
拘制威剛 變化幽冥 迴匝玄鏡 周緯天地  
三五復反 混合太清 陽炁流潤 化入無名  
與我俱仙 上至神庭 日月相望 三光渾形  
越出八極 頭冠天精 左旋右顧 手把七星  
隱身太微 元始炁并

咒畢 又存五神各安坐其宮 五神並吐紫炁以纏我身 覺紫炁  
鬱鬱然也 內外冥合 手足不相見者 乃止 又存日月出我左右頰

間 左日右月 二光洞照 於是紫炁豁然而除 又存日上入我口中 即食之 食之作糒味 九咽止 又存月入我臍中 當命門下 照陰室之間 又存我手把北斗七星之柄 戴以行步 入紫房太微宮中 見帝君 帝君曰 子之得神仙 子之得長年 我以子上青玉之符 書九有之天 我再拜曰 乞隱息太微 合景太一 列侍帝君 周旋靈室 帝君即召太一 太一來帝君前 我又入太一口中焉 合形一景 與太一共為一身體 良久都畢 名此為混合太清 化入無名 日月相望 手把七星 同形太一 隱身帝庭者也 存念五神 都畢 咒文內視所思都訖 乃開目啄齒五過 以左手第三指躡鼻下人中七過 以右手第二指躡兩眉間九過 此為卻轡三五七九 封制百神門戶之法 令百神安兆宮室 三真固兆一體 五神守兆符命 帝君監兆萬闕也 施行之畢 又祝曰 三五相反天覆地始 我有五符 上歸帝子 三元長留 營室之裏 五色相通 方圓元紀 外攘百凶 內拘百史 三真扶我 五神護己 統御魁剛 使我不死 咒畢 存太一坐六合宮中 故與我合形同景也 乃還兩手指放其所攝處 又以兩手掩口 微咒曰

### 洞真太一帝君太丹隱書洞真玄經

清微藏書閣

太一告諸神 皆持陰陽關 不得妄去其宮室 當受對於帝君 一如三真法 二如九天命 此混合變化 所存所行都畢也 太一常以甲午 丙午 戊午日日中時 下遊絳宮 合形真人及兆身也 此是為三合己也 三真炁也 三渾化也 絳宮真人者 處心中之丹田 中元真人居其心中也 三一經 具記其事矣 常以其日日中時 入室存太一下遊絳宮 絳宮真人忽然與太一合形 次又存我入絳宮 忽然復與太一合形 於是絳宮之中 唯覺有太一之身 身形象服 如兆體也 但令形細眇然 有似生孩之始耳 畢 又思存兩鼻孔下 左有日 右有月 日中有黃精赤炁 月中有赤精黃炁 精者 二明之質也 色炁者 日月之煙也 二炁鬱鬱 來入絳宮 絳宮溢滿 二氣復上入洞房中 洞房中鬱滿 又下至黃庭中 黃庭中者 臍下三寸下丹田宮中也 二炁既滿 又入填溢太倉中 二炁洞徹鬱鬱 積胃管中 存太一上行 正當胃管中 南向呼召下元丹田黃庭真人 衣黃衣 巾黃巾 與太一共坐 飲食精炁二十七咽 良久畢 存黃庭真人咒曰

日月之華 黃赤二精 圓光合炁 上發大明

三元飲食 太一受靈

又存太一與中元真人還入絳宮 黃庭真人還下丹田宮 太一與

我合形 還六合宮 畢 兆咒曰

太一帝君上敕三元 又為我敕制百神 百神按次相次留我一身

不得妄出入金門牢玉關 咒畢 又存乳下日月 從兩鼻孔中上到

洞房 洞房中有上一真人 天帝也 天帝是帝君之子 帝君治太極

紫房 天帝治兩眉間卻入三寸為泥丸 丹田上宮 或治在兩眉間卻

入二寸 為洞房宮也 存上一天帝 左右手各持日月 左手持日

右手持月 天帝先食日月 兆當作十九咽 作十九咽畢 天帝吐氣

氣臨太一六合宮中 覺紫煙滿宮 太一吸取紫煙 作十九咽止

名曰混合三一帝 布日月精 變景三宮萬神 常生者也

九宮上一入帝室 三五合炁 其本一七 變入形相 保密五行

參差同根節 此消魔中符 帝君之經也 謂三真相推而上登 五神

稟帝魂而下分 常以甲子日夜半時 存太微紫房宮中 有一童子如

嬰孩之狀 著朱衣 名千景精 字會元子 正當帝君之前 捧赤玉

按 按上有兆五符及命籍也 又存太一從六合宮來上 在帝君之左

### 洞真太一帝君太丹隱書洞真玄經

### 清微藏書閣

童子曰 符籍主生 萬神皆聽 甲乙之記 已書帝庭 請命太一

定甲之名 甲 兆名也 帝君曰 太一童子 百變入己 除死上

生 周而復始 形內萬真 一敕伯史 於是兆身及童子 並合入太

一形中 良久畢 又存太一還六合宮也 名曰混合童嬰於始元之炁

化變太一於三真之際也 故《大洞真經》曰

太微小童 常在帝前 其名景精 其姓曰干

合形太一 被服朱丹 五符命籍 把持玉按

帝君所命 主通諸神 此之謂也

又 高上消魔經 曰

辛子景精 有神有威 合象三形 九道相推

衣服朱丹 步正參差 出入上元 太極內階

知我者生 存我不衰 人無哭兆 恃賴辟非

欲知吾家處 密問太微

此胎中童子變胞太一之魂也 知其名字者 天下萬民無得哭兆

之身也 常存之 辟非災萬禍 長生不死矣 施行變合之日 六甲

皆佳 不必專用甲子日也

太一五神 奉五符 奉五籍 上清帝君混合之道 求長生神仙之訣也



右桃君符 以白為地 丹筆書之

五帝內寶符 太一帝君混化合景之道也 可以本命日書五符 共盛著錦囊中帶之 帶之者長生不死 又常以本命之月中 有本命之日時 入室書五符 向王頓服 畢 咒曰

太一五符 神籍記生 千年萬歲 與天同齡

帝君把籍 命壽不傾

若欲數服此符者 常以五月五日 七月七日 九月九日 夜半生炁時為佳 或以秋分日夜半矣 上五籍奉五符混合帝君 常以本命日月 三月十五日 二十六日 夜半時生炁 取令一室清淨 乃可行之 坐臥任意 坐則接手臨目 臨目者 常閉而不閉也 臥則閉目內視 兩手拊心上 存帝君上在太極紫房宮中坐 存太微小童

### 洞真太一帝君太丹隱書洞真玄經

### 清微藏書閣

侍帝君後 又存太素元成老子侍帝君左 又存太和皇成老子侍帝君右 次存泥丸宮天帝君上入紫房 對帝君前 天帝者 三一之上真帝君之子 泥丸洞房之寶神也 又存帝君 命天帝使召六合宮五神 五神者 太一 公子 白元 司命 桃君 合五人 皆著朱衣絳巾 一神各捧一白玉按 按上有一符 長一寸 廣五分 籍長五寸 廣一寸 事事分別 各有所主 籍簡在符之上也 存籍有鄉里姓名 如上法 五神各奉 以詣天帝 天帝以次取著帝君前 畢 又存帝君命天 帝召兆 令上詣紫房 須臾 兆從左鼻孔中入 上詣紫房 到帝君前 帝君令兆按次讀籍 讀籍畢 以奉天帝 天帝取奉帝君 帝君使兆以次服五符 畢 帝君有命天帝 命召絳宮中元丹田真人 又召下元命門真人 詣紫房中 須臾 二真人上詣紫房帝君前 此二真人者 是中心 臍下三一神也 又存天帝 天帝以忽合帝君形中 覺從口中入 變而合一也 須臾 二老子又入帝君鼻兩孔中 須臾 覺見絳宮 命門二真人 又入帝君口中 須臾 又覺見五神從帝君左耳孔中 入帝君六合中 又存覺兆身及太微童子 從帝君右耳孔中 入帝君六合中 都畢

帝君爾時獨坐太微紫房宮中也 其所命召諸神 并已合形內 變入形於帝君前矣 存帝君咒曰

太上玄清 天地同精 合景紫房 混化萬生

五神三一 二老記名 太微童子 從兆反形

千千萬億 長年以寧 後帝而存 神仙玉清

畢 兆咒曰

混合既畢 死籍已滅 天帝有命 不得忘失

百神帝君 各寶其室 於是乃開目


畢 此為五神奉符籍之時 魂神混合之道 兆精心思而存之焉



右五籍五符混化必生券 以本命日日中時 朱書青紙 作此符一枚 夜半入室存思畢 服一枚 向本命之處也 餘一枚 以鉸刀中破 從上下黑沾處中分之 以一半付灶火中 以一半付井水中 每至本命日輒行之 名曰保神長至之符 帝君記命之券也

### 洞真太一帝君太丹隱書洞真玄經


清微藏書閣



以白紙青筆書之 本命日旦 東向服之畢 咒曰

帝君制命 九炁同煙 使我不死 又得飛仙

制命安形 太上之寶



以白紙雌黃書之 本命日日中時 南向服之畢 南向咒曰

太一明靈 帝君合形 斬滅三尸 魂魄安寧

長在天中 九命無傾 飛昇帝前 七道五生



以白紙丹筆書之 以本命日暮 向本命服之 服畢 咒

天玄地黃 三魂在堂 天黃地玄 三魂在人 不黃不玄 帝君  
記年 不玄不黃 太一不忘 使我安形 萬壽無疆

高仰生西田

右太一制三魂七魄寶命符 常以本命之月 本命之日 本命之  
時 朱書白紙 北向服之 若不知生月日時者 唯所知一耳 亦可  
以戊午日日中時服之

中會太一寶神符

右太上寶神招帝君符 以八節日日中時 朱書白紙服之畢 咒

曰

太上三玄 帝君在魂 太一五靈 保魂安身  
紫房有令 敕制百神

### 洞真太一帝君太丹隱書洞真玄經

清微藏書閣

帝君太一內精神符 合十二首 皆太上元精之炁也 至真至祕  
不得妄傳也 其別復有太一外訣符文 大異者 乃皆中矜帝昌經  
上符也 非此真者 用之無效 兆善敬慎之  
帝君諱逢凌梵 字履昌靈 一名七靈 一名神丈人 常治太極  
紫房中 端坐平正 貌如嬰兒之狀 常有紫炁覆其神形 衣五色華  
衣 巾日月之冠 左耳上有日 徑九寸 右耳上有月 徑一尺 日  
日夕夕常常自存之 此是帝君正形之時 非變化之為也 帝君口常  
詠一文曰

微微深哉 玄首虛全 八風散景 變化冥淵  
幽然絕洞 朗矣寄玄 七神徘徊 鍊柔三魂  
上帝用安 惠在兆身 兆身常齋 慎履飛塵  
我則熙樂 保茲泥丸 血尸入目 穢炁紛紛  
帝與太一 并命五神 棄官廢宅 逕昇九天  
子則忤矣 三命即顛 豈若寂靜 與我纏綿  
此帝君之常吟詠太上虛室之神章也 子常當誦習之 其文以穢  
殄為急吾謂為冥矣 兆有知帝君名字者 忌 可不慎之 兆若有罪

過 欲首謝求除罪者 夜半及日中入室 閉目端坐 北向存帝君在  
兆紫房中 存思如上 因又存兆身在紫房中 伏帝君前 內自陳懃  
併炁良久 匝令一身汗出 衣服沾蒸 如此者三過 自解罪目散  
也 汗匝一體畢 乃咒曰

某甲有罪 上聞百神 乞度七九 水火之患  
守命太一 拘濟帝君 汗流一體 怖在三魂  
恩惟太上 永令除患

畢 因三呼帝君名字

畢 乃開目 名曰帝君懈過之道 內謝五神 流汗為應矣 世

人謝過 乃叩頭搏頰 此外法也 若修此法 若修行三一守洞房

帝君奉太一者 慎不可以叩頭搏頰也 夫人叩頭者 驚三魂 擾泥

丸 慘紫房 傾帝君也 夫人搏頰者 則堅胞結 束魄筋 太一悲

五神迂 乃大忌也 若所行所念 但心存叩頭搏頰 亦內解於心

中矣 仙人存心拜而已 不形屈也 吾謂為冥矣

兆有知帝君名字者 長生不死 形不入地矣 慎不可以告人

告人則衛經玉童玉女去矣 非盟不傳也

## 洞真太一帝君太丹隱書洞真玄經

清微藏書閣

常以庚申日日中入室 或用夜半 存思帝君在紫房中 帝君口

吹一炁 輒成一人 凡作七吹炁 成七人 又存太一從六合中宮來

上詣帝君前 兆已從太一合形 為一人身耳 凡七吹炁成七人

太一及帝君又為二人 都合九人 名為七君 九君 領理血脈筋骨

之道 存帝君有命咒曰

第一白炁君務玄子 第二青炁君按延昌

第三黑炁君賦來生 第四黃炁君祖明車

第五赤炁君焜離子 皆五方色衣 巾五方巾 從次諸神 不得雜

錯

第六上玄君高同生 第七下玄君叔火王 各朱衣黃巾 立吾後

抱圖籍 奉五符

今命第一君主炁 第二君主血 第三君主精 第四君主液 第

五君主神 第六君主魂 第七君主魄 太一君主髓腦 帝君主本命

按次相比 言功記過 刻除死名 長上青書 如天皇內令 於是

帝君咒畢

即又因口中吹出白炁三十過 炁滿紫房 洞薰一身 一身冥合

如在雲霧中 良久 豁然開目止 名為七君 九君校比一身 混  
合白炁 上固泥丸之道也 亦以此法除三尸七積之疾 既  
成而血液不留 不留者 帝君混合 即已留住之矣 故既生而胞胎更結  
胞胎有十二結節 盤固五內 五內滯闕 結不可解 節不可除  
故人病也 由節滯也 人之死二由結固也 常以本命日 若八節  
日上請帝君與太一混合 約制百神 而解胞中牢堅之結 盤根之  
死節也

胞有十二結 內有十二節 節在結內 人不知解脫結節者 亦  
不免死矣 常解之者長生 胞上結一在泥丸中 二在口中 三在頰  
中 四在目中 此胞之四結在上部 胞中結一在五藏中 二在太倉  
中 三在大腸中 四在小腸中 此胞之四結在中部 胞下結一在膀  
胱中 二在陰中 三在後門中 四在兩足中 此胞之四結在下部  
解結之法 入室閉戶存思 先讀帝君以下百神名字 再過畢 乃按  
次解結 此法是帝君太一混合二十四神 解結除尸炁之道也  
兆以本命日 若八節日 日中夜半時任意也 正坐向本命之日

### 洞真太一帝君太丹隱書洞真玄經

### 清微藏書閣

方 接手端心 叩齒二十四通 咒曰 男生某甲 上啟胞父胞母  
始生之日 三積留血 化為十二大結 今本命之日 謹請三元之神

二十四真人 解三關十二結 請言所名

東方青帝彫梁際 字青平

南方赤帝長來覺 字南和

西方白帝彰安幸 字西華

北方黑帝保盛昌 字北伐

玄一老子林虛夫 字靈時道

三素老子牢張上 字神生道

正一左仙人仲成子 一名帝賓 字四華

正一右仙人曲文子 一名光堅 字靈和

太微小童子干景精 字會元子 一名三矜交 一名對帝真

上胎內真等 有九人 外合九炁 是為九君 為甲上解結 結

在上關 四結解散 津血流源 長上生籍 永為天帝仙

太一尊神務猶收 字歸會昌 一名解明 一名寄頻

左無英公子玄元叔 字合符子 一名元素君 一名神公子

右白元洞陽君鬱靈標 字玄夷絕 一名朱精 一名啟成  
中央司命丈人君理明初 字玄度卿 一名神宗 一名靈華  
命門桃君孩道康 字合精延 一名命王 一名胞根  
泥九天帝上一赤子玄凝天 字三元先 一名伯無上 一名伯史華  
泥九天帝卿肇勒精 字仲玄生 一名起非 一名常扶  
絳宮心丹田宮中一元丹皇君神運珠 字子南丹 一名生上伯 一名  
史雲拘  
絳宮輔皇中一卿中光堅 字四化靈 一名幽車伯 一名董史華  
中胎九真 是為九君 迴靈九炁 化入絳宮  
五藏大結 大腸小腸 皆當化散 四結分昌  
中關調利 流注太倉 千災萬禍 一時滅亡  
記上生錄 永無災殃  
命門下一黃庭元王始明精 字元陽昌 一名嬰兒胎 一名伯史原  
黃庭保鎮弼卿歸上明 字谷下玄 一名承申伯 一名承光生  
第一胎中白炁君務玄子 字育常生  
第二結中青炁君按延昌 字合和嬰

洞真太一帝君太丹隱書洞真玄經

清微藏書閣

第三節中黑炁君斌來生 字精上門  
第四胞中黃炁君祖名車 字神無極  
第五血中赤炁君混離子 字叔火堅  
第六上玄元父君高同生 字左迴明  
第七下玄玄母君叔火王 字右迴光  
下胎九君 胞胎內真 生化九炁 是為九魄 九魄精胞中節堅  
使甲不壽中年 願今日奉命 如往初生 乞得解散十二死根 名  
上玉籍 五符入身 下鎮九炁 永得纏綿 上開九宮 下開九關  
脫讀再過 都畢 當和心下炁 勿令音啜而賽也  
又閉目存呼太極紫房天皇太帝君逢凌梵 字履昌靈 一名七靈  
一名神丈人 如此咒之三 又存三九結解真君 東方青帝彫梁際  
等 訖玄母叔火王等二十七人 同著朱衣 巾黃巾 黃巾者 似遠  
遊冠之狀也 貌如嬰兒 無有長短 次引太極紫房 並北向 對太  
帝君而各長跪 其言曰  
上關彫梁際等九人 中關太一務猶收九人 下關下一黃庭始明  
精等九人 三九二十七人 即日緣炁內咽 上開三關 關有二十四


結 結有二十四筋 筋即以斷 結已解散 津血上衝 徑滿泥丸  
玉液下順 哺養百神 即日某甲名上帝籍 長生神仙 畢 又存太  
一名 兆上詣帝君前 帝君曰

胞結已通 光內徹外 使爾長生 命不傾墜 汝可合我形中矣  
帝君因開口 覺我忽入帝君口中 逕到帝君六合宮中 帝君六  
合中又有太一神 名重冥空 字幽寥無 因告兆曰 可食日精矣  
兆即取日精食之 作九咽止 須臾 見向二十七真人 皆在兆左右  
立 二十七真人曰 某甲胎籍已解 穢炁皆除 面已玉澤 體洞太  
虛 長生億萬 帝君同符 又存帝君咒曰

天上同真 是甲之身 天上同靈 是甲之形  
良久 都畢也 此為九君混合內化百神 解胞散結 開利三關  
上合六合 併景帝君 變化命籍 炁鎮泥丸 長生受符 方為天  
仙者也 存思都畢 乃更散髮 更梳頭解衣 更結衣 洗手足者  
兆不能暗誦一二存念者 可入室按文施行之 帝君泥丸中 又有六  
合宮 宮中有帝皇太一君 名重冥空 字幽寥無 兆知之者 朽骨  
更生 五藏生華 終身不畏怖 畏怖之時 北向呼此名三過 咒曰

### 洞真太一帝君太丹隱書洞真玄經

清微藏書閣



羅阿重冥空雷風 幽寥無上生帝君 形祐兆 使無憂  
畢 如與千人同旅

太一帝君解三關十二結胞胎內符 以本命日 若八節日 欲施  
行解結時 先吞此符三枚 向本命處 以真朱書青竹中白膜也 白  
膜生於堅節之內 遂虛中而受靈者也 故書竹膜為解結之符文  
太一曰 人有三魂 利人之存 人有七魄 害人之命 七魄朝  
在人左目下 暮在人鼻人中下 學道者欲臥 先以右手爪按左目下  
及人中 各三七過 甚佳 制七魄之道  
帝君太一寶玄玉經 太上真人藏於五嶽華房之內 非有仙籍者  
不得聞見此也 見之者生 行之者仙 是故重為盟誓 來其天真  
以防宣泄 流布離行耳 自天尊貴仙 然幽祕此道 非仙骨者不  
妄授此也 無至誠者不聞也 有經曰師 受者禮焉 經之傳也 從

師而受經 受經而用弟子之道也 傳授之際 各齋七日 或十日 先後又告齋 各復一日也 古者盟誓 皆歃血斷髮 立壇告天 以為不宣示信人之約也 今自可以金青之陳 以代髮膚之體耳 列於別靜 祝啟上皇 法用金銀三枚 鮮明赤而有光者 青帛三九尺 以代三契之盟 亦可相連為二十七尺耳 受書當寫為兩通 修一機一也 盟物備錄 不得私用以自營也

故太上中經曰 夫師因經業 故稱之曰生受者 習焉以同其誠 推盟誓天 固神告靈 纏綿憂樂 義齊死生 於是 始驗剋終 俱期仙庭矣 爾乃奉拜諮受 修盟曲室 尊卑以顯三潔 分別孜孜之心 寶經藏密 慎行要言 誠存專一 保敬師經 方寸敢墜 如此始可與言神靈之交 道德之契矣 奉經而祕其道 行事而遵其誓 則以列名於玉簡 書帝錄於太極 若違其道也 則七祖受風刀之考 玄母受胎靈之害 身為下鬼 門亦煙滅 擗蒙山之石 以投積夜之河 悲夫 有心之子 其慎祕也哉 此太上真人契令 張天師演出於丹景經中 有是慎盟之書也 受太上帝君之道 用事如此 故記而修行焉

### 洞真太一帝君太丹隱書洞真玄經

### 清微藏書閣

金銀三枚

盟三元之誓

青繒二十七尺

縑帛也

盟帝君二十

四神人之誓也

赤絲五兩

以盟五神公子之誓也

和香二裹

以為告靈交氣之煙也

筆一枚

紙一丈

丹一兩

書盟也

右五種物

以器盛之

不宣露也

皆受書者具之也

弟子寫畢

乃賚書

及物

來詣師室而受書

受書畢

乃得施用耳

不盟受

而竊行之者

案女青詔書

失兩明也

受如不行者

有天火考也

行而不精宣泄者

有風刀災考也

傳非其人

七世父母受其考也

此玄都鬼律女青詔書之旨

洞真太一帝君太丹隱書洞真玄經竟

天運癸巳年酉月正一天師清微弟子洪鼎堅羅大英恭錄彙編